



Medienmitteilung

«Cunsegl d'unfants Grava» e «cunsegl gioven» – la vusch dalla giuvententa

Igl cumegn da Surses sa participescha agl project «participaziun d'unfants e giuvenils aint igls cumegns Grischuns» da jugend.gr, l'uniun tetgala per la promoziun d'unfants e giuvenils aint igl cantun Grischun. Cun chel project less igl cumegn dar ena vusch agls unfants e giuvenils da Surses.

Visiun digl project è da lascher sa participar igls unfants a tot igls affars tgi pertotgan er els. Els duessan purtar aint, sviluppar e realisar lour ideias e giaveischs e furmar uscheia activ lour avigneir.

Igl project participaziun da giuvenils corresponda allas fegnameiras digl maletg directiv Surses 2030 per duple cogestiun e participaziun da vart dalla populaziun scu er la realisaziun digl label UNICEF «cumegn amicabel per unfants».

Per la elaboraziun digl maletg directiv Surses 2030 on igls scolars dalla 5avla classa primara anfignen la terza superioura dastgea numnar la premaveira 2021 lour giaveischs, basigns ed ideias. Aint igl rom digl project participaziun da giuvenils èn nias piglias ancunter la fegn digl onn er igls giaveischs digls scolars e dallas scolaras dalla scoligna anfignen la 4. classa primara. Las ideias rimnadas duessan neir priorisadas durant igls proxims meis ansemen cugls unfants e giuvenils e neir piglias se ainten en plan d'acziun, scu er neir realisos zap per zap.

«Cunsegl d'unfants Grava» e «cunsegl gioven»

Per la realisaziun dalla participaziun da giuvenils ò igl cunsegl da scola do gleisch verda igl schaner per fundar igls cunsegls da scolars. Naschias èn igl «cunsegl d'unfants Grava» cun represchentants da classa dalla scoligna anfignen la 4. classa primara, scu er igl «cunsegl gioven» cun represchentants dalla 5avla classa primara anfignen la terza superioura. Igl cunsegl da scolars vignan accumpagneas da Thomas Eigensatz, assistent da giuvenils.

Construcziun dalla tgesa da scola primara scu aprem project da participaziun da giuvenils

Igl cunsegl da scolars on gio antschet cun lour labour. D'ena vart èn els sa decidias pigls noms digls cunsegls, da l'otra vart on els fatg partratgs ansemen cun lour conscolars pertutgond la nova tgesa da scola primara. Igl video tgi è sa resulto ordlonder vign ad esser la basa da labour pigls architects.

Scu ulterioura activiad prioriseschan igls cunsegls da scolars projects, tgi els peglian ainta mang sez u tgi els lessan sustigneir. Temas scu disco da scolars, kiosk da scola, pero er miglras colliaziuns digl traffic public ainten las vischnancas u er igl avigneir dalla stanza da giuvenils vignan discutos energicamaintg. OTRAS acziuns antras igls cunsegls da scolars vignan a suandar durant igl onn. Igl unfants e giuvenils sursetters èn mutivos e pronts da furmar activ lour avigneir.



Gruppa da manar pigl project participaziun da giuvenils

Igl project vign mano tras an incumbensa digl cumegn da Surses e palo dalla gruppa da manar. Alla gruppa da manar fon part Giancarlo Torriani ed Adrian Ballat (suprstants), Thomas Eigensatz (assistent da giuvenils & represchentant da genitours), Zegna Pittet (represchentanta per scolast*as e genitours) e Linda Netzer (sviluppadra digl li & represchentanta da genitours). Da vart da jugend.gr accumpogna Chantal Bleiker igl project.

Contacts

Per dumondas e reacziuns dastgez gugent s'annunztgier tar Linda Netzer, manadra svilup digl li:

Linda Netzer, linda.netzer@surses.ch, 081 659 11 94

Maletg

Commembers digl cunsegl gioven

Ulteriouras infurmaziuns

Ulteriouras infurmaziuns tigls projects èn da cattar sen las paginas d'internet da project:

Participaziun da giuvenils: www.surses.ch/participaziun-giuvenils

Construcziun nova tgesa da scola primara: www.surses.ch/novascola